

# A C H T E M P E L





*“Ua p̄won ngeni kemi p̄we  
ewe Samon ep̄we wato ekkewe  
manaman I mi sinei p̄we mi  
aucha ngeni kemi atun ouwa  
fori ekkewe asorun aninis me  
fen ngeni non An kewe tempel.*

— Preseten Russell M. Nelson





## Pwata Tempel?

Nepoputan non ekkewe Fansoun Testamen Noom, ewe Samon a annuku ngeni Noun kewe aramas pwon pwe repwe kauuta tempel. Nupwen A aniwinato An Mwichefen, ewe Samon a pwan ureni sefan ewe soufos, Joseph Smith, pwe epwe kauuta tempel.

Non ewe tempel, sia angei auchean afeioch me manaman seni Kot.

Ew me nein ekkewe watten feioch a kawor me non ewe tempel ren ach sipwe nom fengen feinfeino chok ren Kot me ach famini. Ach sipwe angei ei feioch, sipwe fokkun apwonueta An kewe annuk. An Jises Kraist asor me manaman a fori ei an epwe tufich. Kich mi tongeni winiti usun Jises Kraist nupwen sia awora ach fansoun ne nom non ewe tempel me tapweno mwirin An nenien appiru.



1836 NIOSUN KIRTLAND TEMPEL

## Pwon Mi Pin Me Angangepin

Non tempel, sia fori pwon mi pin nupwen sia fori ekkoch kinikinin angangepin an epwe anisi kich ne fefeita non manau. Ew pwon mi pin ina ew pwon sia fori ren Kot. Ew angangepin ina ew foforun mokutukut mi pin a fis ren ewe mumuta seni an Kot we pristut. Angangepin ra anisi kich ach sipwe weweiti me chechemeni ekkewe pwon mi pin sia fori.

Non ewe tempel, sia fori pwon mi pin ne anneasochisi an Kot kewe annuk. I a pwonei an epwe efeiochu kich nupwen sia apwonueta ach pwon mi pin.

Non chok ewe tempel sia tongeni fori ekkewe pwon mi pin me angei ekkewe angangepin mi auchea ach sipwe angei tekian muun me non ewe muun selestial. Ach fori kinikinin angangepinen non tempel ina ew amwararen me auchean kinikinin ach pwon ne tapweno mwirin Jises Kraist. Mi pwan auchea nupwen sia amwonneta pwe fan ew sipwe niwin sefan ne nonnom ren I me Samach non Nang.

## Ifa Usun Upwe Pwisin Mwonneta?

En mi tongeni fori chommong ne mwonneta ngeni ewe tempel. Ren aweve, kopwe ennetin iotek ne kao ewe kapas allimen Jises Kraist me aea An afanafan non manauom. Mi pwan auchea kopwe nukuchar ne afona ekkewe pwon mi pin ka fen forir, usun om kewe pwon mi pin ren papatais.

Papatais ina ewe acwin angangepinen ewe kapas allim. Ina ew tetten mi auchea fiti fengen me om we aanen pwon sefan ngeni Kot. Mwirin papatais, sia angei ewe niffangen ewe Ngun mi Fel, pwan seni ew angangepin. Sia chechemeni usun pwon mi pin sia fen fori nupwen sia angei ewe sakrament iteiten wiik non fan. Pwan ekkoch auchean angangepinen kapas allim mi pachenong epinipinino ngeni ewe Melchizedek Pristut (ren mwan), angei ewe tempel endowment, me ririfengen me non ewe tempel (epwe fansoun manau won fonufan ika mwirin ei manau).









Ekkei angangepinen pristut mi pin me pwon mi pin ra emwen ngeni ekkewe watten feioch minne Samach won Nang a awora ngeni Noun semirit—ewe fansoun sipwe pwan nonom sefan ren I me fiti ach kewe famini nupwen wesin ach manau won fonufan.

## Papatais Fan Iten Emon Me Epinipinino

Ewe Chon Amanau a aiti kich pwe papatais me epinipinino ir mi auchea. Meinsin aramas ir mi mochen tapweno mwirin I me niwin ngeni Samach non Nang repwe papatais me epinipinino. Usun Jises a apasa ngeni Nicodemus: “Pwe esap wor emon epwe tongeni tonong non ewe muun Kot ika pwe esap upusefan ren konik o ren ewe Ngunupin.” (John 3:5)

Ach “upusefan ren konik” wewen ach sa papatais, me ren ach “upusefan ren ewe Ngunupin” wewen sa angei ewe niffangen ewe Ngun mi Fel seni epinipinino.

Nupwen ewe Chon Amanau a aniwinato An Mwichafen me ren ewe Soufos Joseph Smith, I a afanafana pwe papatais mi chiwen namot. I a pwan afanafana pwe papatais epwe fis me ren emon mi wor ren ewe pungun mumutan pristut.

## KOT MI TONGEI MEINISIN NOUN SEMIRIT

Emon me emon aramas ii noun Kot. Meinsin ir mi auchea ngeni I. I mi siner me I mi tonger. Chommong aramas mi wor rer ewe tufich ar repwe etiwa ewe kapas allim me papatais nupwen ir mi manau. Nge met usun ekkewe ir ra mano nge rese papatais ika rese fen sinei usun Jises? Ika ekkewe ra fen papatais me nukun ewe pungun mumuta? Ifa usun repwe pwan tongeni manau? Kot ese monnukireno!

Non ewe tempel, sia tongeni fori ekkewe angangepin ren papatais me epinano fan iten ekkewe ir ra fen mano nge ese wor rer ewe tufichin etiwa ewe kapas allim. Angangepin ra fis fan iten ekkoch ra iteni *proxy* angangepin (ika *ekesiwin* angangepin).

Papatais non tempel me epinipin ra fis fan iten ekkewe mi mano ir niffang ra kawor non tong.

Sia nuku pwe manau mi sotosopono mwirin mano me pungun finata ew nongonong mi fochofoch. Sia pwan nuku pwe ekkewe ra mano ir mi sinei usun ekkewe angangepin ra fis fan iter me ra tongeni finata ika repwe etiwir.

## **SERAFO ME MINAFO CHON MWICHEFEN IR MI TONGENI FITI**

Fopun me anuon mi epinipinino ir mi fichingeni echo taropwen mumuta ne tonong non ewe tempel poputa non January non ewe ier repwene 12 ier. Ei taropwen mumuta a mut ngenir ar repwe no ngeni ewe tempel ar repwe fori papatais fan iten emon me epinono iten ekkewe ra fen mano. Minafo chon mwichefen mi mwukeno ir mi pwan tongeni angei echo taropwen mumuta ne tonong non ewe tempel.

Mumuta ne fori papatais fan iten emon me epinipinino mi pwan tongeni fis fan iten sam me iin, semer chinap me iiner chinap, pwir kewe, tettenin iin, tettenin sam, pwir won iner ika sam, me ekkoch.

Famini mi tongeni pochokununo seni ei fofforun kirekiroch. En mi tongeni mefi anonnonen riri fengen ngeni om famini me ew memefin arap ngeni Kot. Ei memefin winipos a tongeni ngonuk pochokun, emwen, me epinukunuk. Ei epwe efeiochu manauom non chommongun napanap.

## **Tempel Endowment**

Ewe kapas endowment wewen “ew niffang.” Ewe tempel endowment ew angangepin ikewe Kot a ngonuk feioch mi pin. Ir ekkewe feioch chok I a tongeni ngonuk. Ewe endowment ka chok tongeni angei me non An tempel mi pin.

Om angei om tempel endowment epwe ew me nein ekkewe mettoch mi pin non manauom. Chommong chon ewe Mwichefen







ra angei ar endowment me mwen ar angangen misin ika me mwen apupunu. Ekkoch ra chok mefi watten mochen ar repwe nikitu ne sopouloso won ewe aanen pwon. Mi auchea kopwe sinei pwe om endowment ew auchean me amwararen kinikinin om sai esemuch.

Ikkei ekkoch ekkewe niffang kopwe angei seni ewe tempel endowment:

- Watten sinenap usun an ewe Samon kewe popun me afanafan.
- Manaman ne fori mettoch meinisin Kot a mochen sipwe fori.
- Emwen seni nang me tumun nupwen sia angang fan iten ewe Samon, ach famini, me ekkoch.
- Napenon epinukunuk, ourur, me kinamwe.
- Feioch mi pwon ngeni kich iei me feinfeino.
- Ewer, meinisin ekkei amwararen feiochun ewe endowment ra anongonong won ach nukuchar.

Pokiten angangepinen tempel me pwonepiinin ir mi pin me mi wor auchear esemuch, chon mwichefen repwe nimenimoch ne angeir. Repwe pwan tongeni repwe weweiti ekkewe sufonun wis repwe etiwa nupwen ra fori pwon mi pin ngeni Kot.

## Ririfengen non Tempel

Ekkewe watten pwapwa non manau ra pwa me non ew famini mi tong. Mi auchea epwe wor atures an epwe wor pochokunen nefin non famini. Nge ena sokkun atures mi tongeni wato watten pwapwa non ei manau me non fansoun esemuch. Pwan mwo non famini ikewe nefiner mi weires me ese fat, ewe kapas allimen Jises Kraist a awora, epinukunuk, ourur, me chikar. Non an Samach non Nang we kokkotun pwapwa, emon mwan me fefin pupunu ir mi tongeni nom fengen me atongeer kewe feinfeino.

Ewe mumuta ne achufengeni famini feinfeino a iteni ewe manamanen ririfengen. Ina chok ewe pwan manaman Jises a ngeni Noun kewe Aposel fansoun An angang won fonufan (nengeni Matthew 16:19). Ew apupunu esemuch ina minne a iteni ew ririfengen. Semirit mi uputiw me mwumunong non ena sokkun apupunu esemuch ra tongeni riri ngeni ar famini feinfeino. Esap usun ekkewe apupunu minne ra chok fis “tori mano a eimwureno,” ririfengen non tempel a tumunuochu pwe mano esap eimwu feseni ir me atonger kewe.

Emon mwan me fefin pupunu ir mi ririfengen me non ewe tempel ra fori pwon mi pin ngeni ewe Samon me pwan nefiner fengen. Ekkei pwon mi pin a affata ngenir pwe nefiner epwe fis mwirin ei manau ika ir mi ennet ngeni ar pwon.

Ewe pwon mi pin usun pupunu esemuch mi pwan nomot ngeni manau tekia. Manau tekia wewen manau esemuch—ewe sokkun manau Kot a manaueni. Kot a amwochu sinenap meinisin, manaman meinisin, me mirit meinisin. I mi kirekiroch, uren tong, me umoumoch. Manau tekia wewen pwe sia tongeni winiti usun I fan ew. A wewen pwe sia tongeni nonnom ren I non ewe tekian kinikinin ewe muun selestial. Iei ewe watten niffang minne Samach non Nang a tongeni ngeni Noun semirit.

Ewe Samon mi pwan apareni pwe esap meinisin Noun semirit epwe wor rer ewe tufich ne pupunu non ei manau. A pwonei pwe meinisin ekkewe ra etiwa ewe kapas allim me afona ar pwon mi pin epwe wor rer ewe tufich ar repwe pupunu me wor nour semirit, ika epwe non ei manu are ewe manau mwirin.

Ewe angangen ririfengen mi pin mi tongeni ririfengen sam me in me semirit seni tapin aramas meinisin seni nepoputan fonufan. An epwe fang ekkei feioch ngeni aramas meinisin, ekkewe ir mi manau ir mi tufichin mumuta ne fori ririfengen fan iten emon ika fan iten ekkewe ra fen mano. Iwe famini meinisin ir mi tongeni nom fengen feinfeino. Usun meinisin mumuta ne fori





angangepin fan iten emon, ekkei ririfengen achok tongeni fis non ewe tempel.

## Taropwen mumuta ne tonong non ewe Tempel

Tonong non ewe tempel a ew tufich mi pin. Pokiten ewe tempel imwen ewe Samon, I a forata ekkewe nongonong fan iten ekkewe ir mi tongeni tonong me fori kinikinin angangepin non tempel. Seni ew interfiun Taropwen mumuta ne tonong non ewe Tempel, chon mwichefen ra apungano pwe ra achocho ne apwonueta an ewe Samon kewe nongonong. Fansoun ewe interfiu, emon epwe eisini kapaseis minne ra kapaseis ngeni chon mwichefen ikkeiefen ekkewe kapaseis mi tettenitiw won peich 16.

Menimwuk ir chon ei mwichefen ren mwaren ukukun ew ier ir mi tongeni angei ar tempel endowment me ririfengen. Ru interfiu mi auchea ar repwe angei echo Taropwen mumuta ne tonong non ewe Tempel fan iten ekkei angangepin. Aewin repwe interfiu ren nour pisop (ika presetenin pranch) iwe mwirin ren nour presetenin steik ika presetenin misin.

Minafon chon mwichefen me serafo 11 ier me watte seni ir mi tongeni angei echo Taropwen mumuta ne tonong non ewe Tempel seni ar interifu ren emon chon ar we mwichen pisop (ika presetenin pranch). Ei a mut ngeni ir ar repwe fori kinikinin papatais non tempel me epinipin.

## KAPASEIS REN Taropwen mumuta ne tonong non ewe Tempel

- A wor om nuku non me a wor om kapasen pwäratä usun Kot, ewe Sam mi Napanap; Noun we At, Jises Kraist; me ewe Ngun mi Fel?
- A wor om kapasen pwäratä usun ewe Achasefan an Jises Kraist me usun Wisan pwe I om Chon Amanau me Chon Angasano?
- A wor om kapasen pwäratä usun ewe Niwinsefaniton ewe kapas allimen Jises Kraist?

- En mi etiwa ewe Presetenin Ewe Mwichefenin Jises Kraist ren Aramas mi Pin non Fansoun Soponon pwe i ewe soufos, chon osini, me chon pwäratä me i ewe emon chok aramas won fonufan a mumuta ne anganga meinisin ekkewe kiien pristut?
- En mi etiwa chon ewe Aewin Presetensi me ewe Mwichen Engon me Ruemon Aposel pwe ir soufos, chon osini, me chon pwäratä?
- En mi etiwa ekkewe pwan ekkoch Meinap Unusen me ekkewe souemwenin ewe Mwichefen non pwisin neniom?
- Ewe Samon a apasa pwe mettoch meinisin repwe “fis non nimenimoch” me mwen I (Doctrine and Covenants 42:41.) En mi achocho ngeni an epwe wor nimenimoch mi pung non om ekiek me mwokutukut? En mi anneasochisi ewe annukun nisou?
- En mi anneasochisi ekkewe asukun an ewe Mwichefenin Jises Kraist non om mwokututuk mi monomon me napanapom non muun ngeni chon om famini me ekkoch?
- En mi etiwa ika pesei och afanafan, foffor, ika annuk mi ungeni ekkewe an ewe Mwichefenin Jises Kraist ren Aramas mi Pin non Fansoun Soponon?
- En mi achocho ne epini ewe ranin Sabbath, non imw me non fan; fiti om kewe mwich; mwoneta ngeni me angei ewe sakrament non nimenimoch; me manaueni manauom epwe fich ngeni ekkewe annukun ewe kapas allim?
- En mi achocho kopwe wenechar non mettoch meinisin en mi fori?
- En mi emon chon monatiw unusen om eu na engon? Fan iten minafoton chon mwichefen ekkewe ra kutta taropwen mumuta ne tonong non ewe tempel: En mi mochen kopwe anneasochisi ewe annukun monatiw asor?
- En mi weweiti me anneasochisi ewe Kapasen Emirit?



- [Fan iten menimwuk chok] Mi wor om pekin wau aninisin moni ika ekkoch pekinpwan aninis epwe no ngeni emon punuwom akkom are noum semirit? Ika ewer, en mi fori iei ren wisom pwe kopwe anisir?
- [Fan iten menimwuk chok mi endow] En mi anneasochisi ekkewe pwon mi pin ka fen fori me non ewe tempel, mi pachenong ufouf ufoufen tempel mi affatetiwi me non ewe endowment?
- Mi wor tipis mi anieput non manauom mi auchea an epwe wesino me ren souemwinin pristut pwe pekin om aier?
- En mi ekieki pwe en mi nimenimoch ne tonong non imwen ewe Samon me fori ekkewe angang mi pin non tempel?

## Niwin Ngeni Ewe Tempel Fan Chommong, Ika Mi Tufich

Ewe tufichin feino ngeni ewe tempel ina ew watten feioch. Feino fan chommong, ika en mi tongeni. Kaeo fan chommong usun an Kot kokkot fan iten Noun semirit, mefi ewe Ngun mi Fel, me fori angangepin fan iten om kewe newo.

Usun ren meinisin pwan ekkewe angangepin mi fis me non ewe tempel, ekkewe ir ra mano ir mi sinei usun ewe angang ka awora. Iwe mwirin ra tongeni finata ika repwe etiwa met we ka fen fori fan iter.

Om feino ne fori pekin angangepinen tempel fan iten emon a pwan mut ngonuk ewe tufich ne ausening sefan ngeni ekkewe feioch, ourour, me pwon mi pin. Seni om fori ekkewe angangen non tempel, katongeni kuna chommong napanap usun ewe kokkoten amanau a efeiochu manauom me manauen atongem kewe. Met ka kaeo me mefi repwe fatafatochuno me repwe kon auchea ngonuk non fansoun ran me ran. Nupwen ka chuuno, kopwe mefi an Kot tong me epwe achechema met mi kon auchea.



## Angang Usun Emon Chon Angangen Tempel

Chon angangen non tempel ir chon mwichefen mi wor nour taropwen mumuta ne tonong tempel me chon mochenrepwe angang non ewe tempel inet chok ra finata.

Ekkewe chon angangen non tempel ra anisi chon mwichefen ar repwe fori ar angangen tempel. Ra pwan aninis non ewe ofesin tempel ika ren pwan ekkoch mi auchea. Chon angangen non tempel rese kamo. Chon angangen non tempel ir mi tongeni ekkwe mi nipich ika pupunu, anuon me fopun ika chinnap.

Ika ke mochen kopwe emon chon angangen non tempel, kose mochen porous ngeni noum pisop ika presetenin pranch.

